

Meeqqat atuarfiat pillugu Inatsisartut peqqussutaata allanngortinneqarnera pillugu Inatsisartut peqqussutaat pillugu siunnersuut.

(Perorsaanermut aamma tarnip pissusaanut tunngasunik siunnersuinerup kommuninut suliaassanngortinneqarnera)

(Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Aappassaaneerpeqarnera

Naalakkersuisut sinnerlugit Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq qujaffigiumavara, meeqqat atuarfiat pillugu Inatsisartut peqqussutaata allanngortinneqarnera pillugu Inatsisartut peqqussutaat pillugu siunnersuutip, perorsaanermut aamma tarnip pissusaanut tunngasunik siunnersuinerup kommuninut suliaassanngortinneqarnera pillugu siunnersuutip pitsaasunik suliarineqarneranut.

Allannguutissatut siunnersuut pillugu Ataatsimiititaliaq ima allappoq:

“Aaqqissuussaaneermut ataatsimiititaliap innersuussutaasa inatsisitigut aalajangersarneqarnissaanik Naalakkersuisut kissaateqarnerat ataatsimiititaliap paasisinnaavaa. Siunnersuummili aningaasaqarnikkut sinaakkutissanik ilisimasaqannginneq ataatsimiititaliap sulineranut atatillugu naammaginangitsutut isigalugu. Maannakkulli aningaasaqarnikkut sinaakkusiussat iluini siunnersuutip piviusunngortinneqarsinnaanera pillugu Naalakkersuisut naliliisimanagerat ataatsimiititaliamit taamaattoq ilisimaneqarpoq. Tamanna tunuliaqutaralugu siunnersuummik akuersissutiginninneq Namminersorlutik Oqartussanut aningaasartuuteqarnerulersitsissanngitsoq ataatsimiititaliamit naatsorsuutigineqarluinnarpoq”.

Naalakkersuisut oqaatigineqareersutut nalilerpaat, maannakkut aningaasaqarnikkut sinaakkusiussat iluini siunnersuutip piviusunngortinneqarsinnaanera. Taamatuttaarlu Naalakkersuisunit kissaatigineqarpoq isumaqatigiinniarnert naammasseriarpata inatsisissatut siunnersuut atuutilersinneqarsinnaassasoq.

Tunniussinerup kingunerisaanik PPR-ip suliaasa pitsaassusaasa appartinneqannginnissaata qulakkeerneqarnissaa pillugu PPR-imik kommuninut tunniussinerup nalilernerqarnissaanik Demokraatit siunnersuutaat ataatsimiititaliamit pitsaasutut isigineqarpoq. Naalakkersuisut isumaliutissiissummut akissummini oqaaseqaatiminni tassunga tapersiinnissaanik ataatsimiititaliap qinnuigaa.

Naalakkersuisut maluginiaqqussavaat, atuarfik pillugu Inatsisartut peqqussutaanni § 32, imm. 1-imi Naalakkersuisut kommunit atuarfik pillugu Inatsisartut peqqussutaannik ingerlatsinerisa nakkutiginnissaanut pisussaaffeqareermata, tamatumani aamma allannguutissatut siunnersuut akuerineqariapat perorsaanermut aamma tarnip pissusaanut tunngasunik siunnersuineq.

PPR-ip kommuninut tunniunneqarneranut atatillugu suliat pillugit, matumani aningaasaqarnermut tunngasortai ilanngullugit ingerlaavartumik ilisimatinneqartarnissamik ataatsimiititaliaq aammaat-taaq qinnuteqarpoq.

Naalackersuisut ataatsimiititaliap qinnuteqaataa akuersaarpaat.

Taama oqaaseqarlunga suliassaq Inatsisartuni sammineqartussanngorlugu tunniuppara.